

Dunna, um, uffant

Co vivevan dunnas, umens ed uffants pli baud? Quant enavant sa differenziavan lur cundiziuns da viver? La perscrutaziun istorica è ditg s'occupada bunamain mo dals umens; quai vala er per il Grischun. Las dunnas ed ils uffants grischuns e lur cundiziuns da viver èn percenter perscrutadas mo per part. La seria da quatter volums «Fraubünden» (2003–2008)¹ ha avert emprimas perspectivadas sin vitas da dunnas dal 19. e 20. tschientaner; per il temp avant l'onn 1800 n'exista percenter bunamain nagina litteratura. Diversas funtaunas dattan però invista.

Cudeschs da baselgia conferman per exempel che las dunnas dal temp avant l'onn 1900 avevan savens dapli uffants che quai ch'è usit da preschent. Ina chasada cumpigliava en media var tschintg persunas, dentant cun ina mortalitad dals uffants bundant pli auta ch'actualmain.

► **28 Famiglia e chasada** Quella mortalitad dals uffants n'era betg adina e dapertut la medema: Entant ch'i murivan mintgatant en ina vischnanca bunamain tut ils uffants d'ina annada avant il tschintgavel anniversari, survivevan tuts en auters onns.²

La famiglia dal reverenda Jecklin da Schiers preschentada qua sco exempel aveva pia per ses temp ordvart blers uffants.³ **27.01** En auters regards era la famiglia però tipica. Dus figls han per exempel tschernì la professiun dal bab, quai ch'era tuttavia usità en talas familias. En regiuns reformadas devi veritablas dinastias da preditgants, sco per exempel la famiglia Schucan en l'Engiadina. In destin frequent ha tutgà il figl Jacob: El è mort sco mercenari en servetschs esters. Dus figls n'han betg maridà – er quai in exempel derasà, surtut en familias da purs.

Il motiv era il dretg d'ierta che sa basava sin partiziun reala: Per ch'ìl possess na vegnia betg dividì memia ferm, na dastgavi betg dar memia blers descendents. Per il medem motiv na maridav'ins betg memia giuven. En la famiglia Jecklin han maridà dus figls cun 30, ina figlia cun 26. Plirs uffants èn svanids finalmain dal cudesch da baselgia da Schiers – probablmain han els bandunà Schiers per tschertgar lur fortuna utrò.

Er il 20. tschientaner maridav'ins plitost tard. Fin l'onn 1950 avevan pli che la mesadad da las dunnas che sa maridavan passa 25 onns, alura eri fin l'onn 1980 usit da maridar pli baud, dapi lura crescha la vegliadetgna da sa maridar puspè.⁴ Ina vegliadetgna pli auta cun maridar inditgescha per il solit in meglia stadi da furmazion e dapli autonomia (finanzia). Er la rata da divorzis è creschida fin l'onn 2010 parallel a la vegliadetgna matrimoniala. Dapi lura sa diminuescha ella puspè – il medem mument vegni dentant maridà adina damain.⁵ Il dumber dals pèrs che vivan ensemen senza esser maridads n'è betg registrà.⁶ **27.02**

Schebain che figlias e figls iertavan da princip medemmain bier, eran dunnas discriminadas legalmain e politicamain fin il 20. tschientaner tardiv. Dal temp da la Republica da las Trais Lias vegniva il possess d'ina dunna maridada administrà da ses conjugal. L'onn 1848 ha introduci il chantun l'avugadia generala da dunnas sulettas u vaivas; l'onn 1881 è ella puspè vegnida annullada sin cumond da la Confederaziun.⁷ Pir l'onn 1972 ha introduci il Grischun il dretg da vuschar chantunal per dunnas.

Malgrà quellas discriminaziuns eran dunnas adina activas en l'economia – e quai betg be en l'agricultura famigliara. Ils protocols notariali




27.06
Quella giada sco er ozendi maridan Grischunas pli baud che Grischuns: spus nunenconuschents en l'Engiadina, ils onns 1920.





27.07
Durant blers tschientaners era la tgira d'uffants integrada en il mintgadi da las dunnas. Qua ina lavunza a Beiva, ca. l'onn 1928.


27.01
La famiglia Jecklin da Schiers, 1650–1732
Madalena Biäsch da Porta ha parturi 12 uffants en 25 onns. Las biografias dals fragliuns Jecklin eran en blers regards tipicas per quel temp: plirs èn morts en lur uffanza, dus frars han prendì la professiun dal bab, in frar è s'engaschà sco mercenari en servetschs esters. Ins na maridava – sche insumma – betg memia baud.



27.02
Vegliadetgna da maridaglia da Grischunas e Grischuns, 1880–2020
Grischunas maridan pli baud che Grischuns – quai valeva tant l'onn 1880 sco er l'onn 2020. Las parts da tut ils spus sut 24 onns sa midan fermamain, cun ina culminaziun ils onns 1970.



27.03
Dunns ed umens tar il notar en l'Engiadin'Ota, 1500–1600
En l'Engiadin'Ota dal 16. tschientaner regnava ina vita economica multifara – ed adina puspè er dispa. Bleras transacziuns e sentenzias en dispitas civilas èn vegnidas documentadas dal notar. Dunnas eran participadas a tut las activitads e represchentan en media sur tut las transacziuns e sentenzias var 20% da las partidas da fatschenta e da dispa.



- Transacziuns documentadas notarialmain en pertschents
- contracts da fittanza (prada, ers)
 - quittanzas (pajament da venditas, restituziuns dals debits)
 - brevs ipotecaras (emprests privats, pajaments suspendids)
 - barat u vendita da chasas u da terren
 - sentenzias en dispitas civilas (partiziuns d'iertas, vendita da muvel, restituziuns da debits e.u.v.)
 - autres (plainpudairs, testimonianzas, fundaziuns e.u.v.)

27 da l'Engiadin'Ota dal 16. tschientaner mussan per exempel: en las differentas transacziuns legalisadas notarialmain era var in tschintgavel da las partidas contrahentas dunnas.⁸ 27.03 Pli tard èn cumparidas dunnas sco mainafatschenta, uschia per exempel las dunnas dals pastiziers durant l'absenza da lur umens u il 19. tschientaner en il sectur dal turissem en svilup: Maria Berry, la dunna dal pionier d'hotellaria Johannes Badrutt, ha giugà ina rolla activa en ils hotels da la famiglia – en l'«A la Vue du Bernina» Samedan e pli tard en il «Kulm» San Murezzan – sco ch'i mussan sia agenda ch'è mantegnida e sias brevs.⁹ Ultra da quai ha ella gi' indesch uffants.

Fin il 19. tschientaner lavorava la pli gronda part d'umens e dunnas grischunas en l'agricultura. Las lavurs eran separadas tenor schlattaina, ma sch'in um mancava u era absent, surpigliava la dunna er lavurs masculinas sco il segar cun la fautsch. Il 19. tschientaner èn sa sviluppadas sper l'agricultura novas professiuns, per exempel en il turissem u en il commerzi. Cun quai è er creschida la part da dunnas che lavorava dador l'atgna famiglia per ina paja. L'onn 1880 eran quai gia 35 pertschient da las dunnas, senza resguardar las emploiadas en chasas privatas; l'onn 2000 eran quai 69 pertschient. Il Grischun era cun quai levamain sut la media svizra da 71 pertschient.¹⁰

Entant che las dunnas collavoravan en la puraria famigliara, era la tgira dals uffants integrada en il mintgadi. 27.07 Tar lavur da gudogn externa da tuts dus geniturs stuevan las famiglias dentant tschertgar fin il 20. tschientaner tardiv schliaziuns privatas: Structuras complementaras a la famiglia mancavan ditg. L'emprim èn ellas vegnidas stgaffidas en la regiun da Cuir. Sco reacziun a la crisa da drogas dals onns 1990 ha relaschà il chantun l'onn 1997 la Lescha d'agid per persunas toxicomanas che pussibilitava da contribuir ad organizaziuns da la tgira d'uffants complementara a la famiglia activas surregionalmain.¹¹ Pir l'onn 2003 ha relaschà il Cussegl grond in'atgna lescha per promover la tgira d'uffants complementara a la famiglia¹² ed ha reconuschì cun quai la necessitad da pussibilitar a tuts dus geniturs ina lavur da gudogn dador chasa. Uschia è vegnida stgaffida la gronda part da las canortas d'uffants ed uniuns da geniturs dal di pir il 21. tschientaner.¹³ En pliras regiuns na devi er l'onn 2022 anc naginas offertas correspudentas, per exempel en la Val Müstair. 27.04

Ditg eri usit ch'uffants lavoravan da fitg pitschen ensi, il pli en l'agricultura dals geniturs. Fin l'onn 1900 vegniva dà scola en il Grischun per regla mo l'enviern, e blers uffants èn stads davent da l'instrucziun er suenter l'introducziun da l'obligaziun d'ir a scola. Fin la segunda mesa-

dad dal 20. tschientaner è la scolaziun dals uffants restada secundara a la collavoraziun agricula; mo cunter gronda resistenza da la populaziun ha la durada da scola annuala pudì vegnir auzada a var 40 emnas.¹⁴

Gia per il 17. tschientaner tempriv è cumprovada l'emigraziun stagiunala dals uffants sco forzas da lavur agriculas bunmartgadas, l'uschenumnà ir al Schuob. Il 19. tschientaner èn sa rendids tschertas stads fin milli uffants en la Germania dal Sid. Els derivavan per gronda part da la Surselva ed avevan tranter sis e 16 onns. La segunda mesadad dal 19. tschientaner è creschida la part da mattas da questa emigraziun da lavur stagiunala d'uffants ad en media 38 pertschient.¹⁵ 27.08

Las pussaivladads da sa scolar eran en il Grischun gia adina limitadas. Per absolver ina scolaziun pli auta tramettevan las famiglias signurilas lur figls gia il 16. tschientaner a Turitg, Basilea u ad universitads tudestgas u talianas.¹⁶ ► 45.02 Stipendis per figls grischuns eran in med bainvis tar pussanzas estras per star bain cun la Republica da las Trais Lias. Er per emprender in mastergn èn blers mats grischuns ids lunsch davent. En ses diari dals onns 1660 menziuna Andreas von Salis-Samedan adina puspè gruppas da giuvenils che partivan per Venezia per cumenzar là lur emprendissadi.¹⁷

Oz pon giuvenils grischuns studegiar en il Grischun a pliras scolas autas spezialisadas, ed ina piazza d'emprendissadi chatta la gronda part per il solit en il chantun – sche er savens lunsch davent da chasa.¹⁸ 27.05

1 Hofmann e. a. 2003–2008.
 2 Cudeschs da baselgia da Brusio, Scharigna, Glion, Schiers, Tschappina, Vaz Sut.
 3 La descripcziun sa basa sin il cudesch da baselgia da Schiers.
 4 Dumbraziuns federalas dal pievel.
 5 Dumbraziuns federalas dal pievel.
 6 Infurmaziun da la partiziun statistica e register da l'Uffizi per economia e turissem dal Grischun.
 7 Redolfi 2003, p. 19–46.
 8 Protocols notarial, 16. tschientaner.
 9 Badrutt-Berry, brevs 1847–1857; agenda 1856.
 10 Dumbraziuns federalas dal pievel.
 11 Chantun Grischun, agid per persunas toxicomanas, 1997, art. 9.
 12 Chantun Grischun, tgira d'uffants complementara a la famiglia, 2003.
 13 Federaziun spezialisada per la tgira d'uffants dal Grischun, 2001–2020.
 14 Marti-Müller 2007, p. 285–289.
 15 Seglias 2004, p. 34 (pertschientuala mattas), p. 15–34 cifras generalas.
 16 Bonorand 1949.
 17 Salis, diari 1656–1666.
 18 Uffizi per la furmaziun professiunala dal Grischun, 2021.




27.08 Dus Schuobacheclers dal Grischun (cun chapè) tar ina famiglia da purs ad Arnach (DE), 1907



27.09 Irina Tuor da Breil, emprendista spezialisada dal sectur da sanadad a l'Ospital chantunal dal Grischun ils onns 2013 fin 2016, è daventada campiunessa mundiala als Campiunadis mundials da mastergns ad Abu Dhabi l'onn 2017.

27.04 Tgira d'uffants complementara a la famiglia, 2000–2020

Durant tschientaners era la tgira d'uffants chassa privata, schebain prestada da la mamma u d'altres persunas, pajadas u betg pajadas. Pir vers la fin dal 20. tschientaner èn sa sviluppadas structures sustegnidas dal stadi. La charta mussa las instituziuns da tgira per uffants da la vegliadetgna prescolara: 25 canortas e 4 uniuns da famiglias dal di. Las uniuns cuvran potenzialmain grondas regiuns, lur purschida è dentant limitada numericamain e fluctuescha ferm.




Uniun da famiglias dal di cun in grond intschesch

■ avant 2000
 ■ 2000–2009
 ■ 2010–2019
 ■ dapi 2020

27.05 Mobilitad dals emprendists, 2021

Per emprender ina professiun stuevan ils mats grischuns viagir dalunsch gia il 16. tschientaner, mintgatant schizunt fin a Venezia. Oz absolvan ils blers giuvenils grischuns lur emprendissadi en il chantun d'origin – ma betg exnm en il lieu da domicil.



Dumber d'emprendistas ed emprendists da 5 vischnancas tschernidas; las frizzas mussan dal domicil al lieu d'emprendissadi

■ Cuir
 ■ Brusio
 ■ Tavau
 ■ Mustér
 ■ Surses